

直隸絳州志卷之十二

孝義

周

申生晉獻公世子獻公誤信驪姬讒將殺之公子重耳謂之曰子盍言子之志於公乎世子曰不可君安驪姬是我傷公之心也曰然則盍行乎世子曰不可君謂我欲弑君也天下豈有無父之國哉吾何行如之使人辭於狐突曰申生有罪不念伯氏之言也以至於死申生不敢愛其死雖然吾君老矣國家多難伯氏不出而圖吾君伯氏苟出而圖吾君申生受賜

而死再拜稽首乃卒

靈輒爲翳桑之餓人晉趙宣子田見而食之舍其半問之曰臣游宦三年矣未知母之存否今近焉請以遺之使盡之而爲之簞食與肉寘諸橐以與之旣而晉侯欲殺宣子飲之酒伏甲將攻之輒與爲公介倒戟以禦公徒而免之問何故對曰臣翳桑之餓夫也昔蒙公惠故報之問其居名不告今城北八里有哺餓坂靈輒廟在

鉏麇晉力士晉靈公使賊趙盾晨往寢門闢矣盛服將朝尙早坐而假寐麇退而嘆曰不忘恭敬民之王

也賊民之主不忠棄君之命不信有一於此不如死也觸槐而死

提彌明晉卿趙盾之右靈公飲盾酒伏甲將攻之明知之趨登曰臣侍君宴過三爵非禮也遂扶以下公噉葵明搏而殺之鬪且出明死之盾獲出奔

公孫杵臼晉大夫趙朔客屠岸賈滅朔族朔婦匿宮中生男屠岸賈索之急杵臼與其友程嬰取他兒衣以文葆匿山中程嬰謬告諸將攻之杵臼謬抱兒呼曰天平趙氏孤兒何罪請活之獨殺杵臼可也不許遂殺杵臼與孤兒後真孤趙武出復故位爲之繁邑春

秋祀之

程嬰晉大夫趙朔客朔被殺與友公孫杵臼謀匿朔子山中居十五年晉景公問趙後韓厥以實告乃召趙武程嬰復田邑及趙武冠乃辭曰昔我非不能死我思立趙氏之後今旣立我將下報趙宣孟與公孫杵臼武啼泣固請嬰曰不可杵臼以我爲能成事故先我死今我不報是以我事爲不成遂自殺趙武服齊衰三年爲之祭邑春秋祀之

北魏

吳悉達兄弟三人俱幼父母爲人所殺號慕感動鄉隣

及長爲報仇避地永安兄弟同居四十餘年讓逸競
勞閨門和睦鄰人孤窘者輒解衣輟糧濟之鄉閭五
百餘人詣州請刺史表贈其父渤海太守後圖改葬
失父舊墓所晝夜哭禱於神出行所履地忽陷得父
銘記因遷葬宗祖以下三世九喪哀毀如初有司奏
聞旌其閭

北周

梁 慎九歲善文辭天性至孝授洛川曲周縣主簿親
沒泣血設影供養出告入面不異生時墓側結廬負
土益塚時有鳩翔醴泉之瑞絳州刺史孟說奏狀勅

下旌表其門弟九思甫能言卽知孝親敬長後以孝
弟徵寄嵐州錄事參軍操履清潔尋引退晨昏事父
母遺像有如生日

唐

趙師舉父爲人殺師舉幼母改嫁仇家師舉長晝爲人
傭夜讀書久之手殺仇人詣官自陳高宗嘉其孝赦
之

義橋孝子嘗成橋於稷山縣南汾水上三十喪父母五
十猶衰麻鄉黨捨氏不名貴之也

元

呂祐字伯通晉安人至正二十六年城破有卒入室
潛其母索貲不得揮刀欲砍之祐急以身蔽母奪其
刃指盡落傷仆地良久而甦開目視母曰母幸無恙
死可無恨遂瞑而死

姚好智居喪廬墓元史孝友傳作子智

明

陳璽父恕任貴州參議卒於官璽扶櫬歸廬墓終喪
天順閒旌表充貢入監任隆慶州判官

陶治字時泰號石橋琰次子以父廕官兩浙運司同
知親老不願仕進父促之謁選授右軍都督府都事

未幾乞終養歸承顏順志左右無方親疾躬侍湯藥
百方醫禱親沒哀毀骨立廬墓終喪庭產瑞芝咸謂
孝思所感云

張 益字伯謙父聰卒於延益扶櫬歸逆旅主人不納
櫬益依櫬露處風雨驟至不移也季弟增毆人誤至
死益念弟未舉子爲代其罪會赦得釋生平不染聲
色人號爲無塵翁子本慶陽府教授孫與行重慶府
知府姚江史太史表其墓

鄭 恩正統六年歲大飢出粟千石以賑郡守上其事
奉勅旌獎

王貢三林人有義聲三林河堤圯衆推貢督修貢任勞盡瘁不閱月工完至今賴之兩薦賓筵壽九十九人稱百歲翁云

許河例貢鴻臚寺序班萬厯十四年飢河偕族人許敦實各出百金助賑城南渡汾官橋歲用民力時修時圯河捐貲創建浮橋濟者稱便

梁范字式菴例授太醫院吏目敦信義好施予董修學宮捐置義田聞喜三泉等莊嘗負租數百石貸錢數百緡范憐其貧悉爲焚券里人稱之

梁蒞同里舉人陳紹吉除保安知縣未幾卒妻子扶

櫬歸窆無告蒞倡里人張與行陶登陳紹信梁范等各出百金或五十金協濟之紹吉妻子朝夕得贍焉萬歷二十一年本州判官汪卒蒞具棺以殮人稱篤行云有推贈

侯裕福大聶里民父懷玉病危號泣絕食籲天求代父病以愈尋被牛舐腸出氣絕隣人納而縫之遂甦時謂孝感事母張尤謹母卒與弟裕祿哀毀廬墓門旁枯井生甘泉嘗收養遺孤辛成金范長命撫之完娶回籍又拾還李晉臣遺金晉臣欲割其半以謝卻不受上憲旌之

孫 統字仰東桂林坊人魁偉有材幹丰裁峻整燕居
獨處必正衣冠而坐慷慨好義排難解紛里人多賴
之萬曆中居秦之三原邑人貸五十金如約以償乃
卮酒款迎曰吾藉此爲母歲權子以仰事俯畜然義
不可負吾舉家自此無生路矣言已泣下統慨然不
受其償而焚券焉會秦大飢捐金以賑道殣相望市
蓆斂埋之有推贈

韓

傑字漢卿例貢鴻臚寺序班業賈遊吳越胸次洒
落綽有風致宗族貧者建義宅以處之生養死葬悉
贍焉戚友稱乏多方賑助捐金修學爲諸生倡生平

所積以仗義散盡家無宿春不恡也年五十二卒祀鄉賢

楊培基例貢光祿寺署丞好善樂施捐貲修城修學
辛思恭萬厯間年飢出粟五十石以賑上憲旌其義
韓育中字統元萬厯丙午鄉魁幼失怙家貧勤學事祖
以孝聞督學周公繼昌檄旌之

王宏先字孝公南社人幼聰慧七歲能文十二補弟子
員旋食餼好學不倦淹貫經史事母孝母疾侍湯藥
彌月不解帶母沒勺漿不入口竟以哀毀致疾易簣
時猶衣衰經云撫憲蔡公懋德檄旌之題其墓

衛聚德王村人樂善好施族人貧不能辦徭役聚德捐
置義田歲收租代完之又廣具棺以給貧不能殯者
撫憲曹公爾正旌其門曰惠睦

來 童年十四家貧傭工於梁崇禎初大荒絳人飢死
者壕坎皆滿童父死坎中歸求父屍不能獲號泣三
日不食死

叟時盛母病噎服藥罔效時盛徧求醫或云股肉可療
乃割股和麵以進母遂愈

陶天長割股療親疾見平陽府舊志

梁從高庠生嫡母得咯血疾醫不治乃與兄應高各割

臂肉一片煎藥奉母病遂愈人稱梁氏雙孝

陶都字允諧瑛裔孫幼失怙事祖師孟甚孝祖病醫藥罔效都截指瀝血書哀詞禱於神祖遂愈平生好義樂施賙人之急各憲俱旌之

馮經字九有庠生母病割股和藥以進母遂愈上憲旌之

李國定庠生事親備極孝養親沒每飯供饌如生存上憲旌之

李思誠庠生崇禎閒歲屢飢兄弟三人尊母命捐三百金以賑奉勅旌其門曰賢母義方

孫枝妍庠生甲申之變賊入城執其父括黝枝妍給賊
釋父奉貲父得脫賊索貲不獲挺刃交加創甚閱日
死

韓無斃庠生崇末舉家避稷山後澗頭堡內夜半賊
入堡執其父人皆踰堡以去無斃曰父被執焉去之
遂與弟無期偕死難

楊櫟丁村人捐置義學延塾師訓童蒙置沃產十五
畝課租入爲館餼王大令震亨有碑記又捐資百金
歲權子母爲族人丁徭之費

張琛北平原人性至孝父篤疾百方醫禱無效晨夕

顧天願相隨地下奉事竟先父沒之二日死

段世雲字祥吾好善樂施嘗於渡汾浮橋捐板百葉每年給水手工食銀十四兩四錢子文錦繼之姪孫炳然復捐板百葉人推世德有推贈

吳思聰勤儉治生好施濟崇禎閒歲頻飢出粟二百石以賑又廣市蓆以瘞委骸壽臻大耋孫枝競秀人稱積善之報云

趙統號溪翁賈西甯嘗收木棉數萬斤鬻於市僕潛輕其衡統偵覺折衡逐僕歲歛出粟減價以糶貧不能償者盡蠲之有客郭世奇遺黃金數斤統拾諸邸

舍訪其人還之孫桐癸丑進士

張真字子純少時買於秦上郡有僧行乞真每推食食之久而不厭僧行出錢萬緡以報真辭不受南遊雲閒晨瀉盥水於地地甃隙中受水甚虛怪發之有錢一壘亟掩之其不俸非分之獲類如此生平以孝弟著聞鄉黨重之有推贈

陶祐字吉甫幼積學精於醫活人甚衆人有緩急輒傾所有應之貧不能償者焚其券子登壬辰進士

段世慶字光緝庠生性孝友尙義樂施崇禎間歲大祲輸粟煮粥以賑後疫作施藥以療病者又廣置棺以